



La senda da tschemas procura adina aunc per discussiuns el vitg da Laax. Il december 2018 haveva la radunonza communal approbau il credit pìl project.

VISUALISAZIUNS MAD



La tuor d'entrada a Murschetg resta sco projectada. La lingia en direzziun Cons e vitg da Laax vegn denton scursanida per rodund 500 meters.

La passarella vegn «mo» 1560 meters

La senda da tschemas da Laax ei sin buna via, ell'ei denton redimensiunada

DAD AUGUSTIN BEELI / ANR

■ **Avon dus onns han ils da Laax survegniu las empremas informaziuns d'in project spectacular. Dapi lu cuschuna la senda da tschemas adina puspei discussiuns. Il december 2018 ha la radunonza approbau il credit da 7,5 milliuns francs. Suenter Pastgas entscheivan las lavurs, la distanza ei denton scursanida.** Na, na, quei constetti insumma buc, il project vegni realisau, declara il president communal da Laax. La FMR ha confruntau *Franz Gschwend* culla currella che va dapi in temps ella regiun. La senda da tschemas vegni buca realisada, differents recuors impedeschien il project, aschia che la vischnaunca hagi decidiu da metter en truchet quel. «Quei ei definitiv falliu. Suenter Pastgas vegnin nus ad entschei-

ver. Igl'empreman ils sochels dallas petgas e dallas duas tuors betunai», puntuescha il president communal. La senda da tschemas duei vegnir aviarta silla stagiun da stad 2021, explichescha el. Malgrad ch'ins hagi stuiu surluvrar il project e scursanir la lingia seigi la passarella aunc adina la pli lunga senda da tschemas ell'Europa, gi Gschwend el discuos culla FMR. El renda attent al plan general d'avertura che la regenza grischuna ha approbau.

Senza Uaul Casti

Sco quei ch'il president Gschwend conferma ha la vischnaunca da Laax daferton tuttas lubientschas necessarias per realisar il project. Gschwend conceda denton ch'ins hagi fatg, sin fundament da protestas inoltradas, pliras adattaziuns. Aschia ei la distanza nova dalla senda da tsche-

mas buca pli 2020 meters, mobein «mo pli» 1560 meters. Tenor il plan niev meina ella buca pli tras igl Uaul Casti. La senda alzada ora denter tschun e 12 meters untgescha ils mirs dalla veglia ruina da Lagenberg, consequentamein ei era la plattafurma Plaun Casti strihada.

Il december 2018 haveva la radunonza communal da Laax approbau il credit da baghegiar per quei project. Cun 289 presents fuvi stau ina radunonza da record. La senda da tschemas haveva evocau las emoziuns. Il resultat dalla votaziun a scret fuva staus – silmeins per las relaziuns da Laax – detg cuntradicitoris. Il credit da baghegiar ha la radunonza acceptau cun 171 encunter 106 vuschs. Suenter la decisiun da principi vegni la suprastanza communal a far ils proxims pass, haveva la suprastanza communal empermess. Quels ein lu era suandai. Il

mars han la radunonza burgheisa e quella dalla pleiv dau glisch verda per la senda da tschemas. Il zercladur 2018 ha sin quei era la possessura dalla gronda surfatscha pertuccada dau il consentiment.

Tuor a Dimplau ei zuppada

Ils burgheis da Sagogn han giu il davos plaid el capetel. La vischnaunca politica da Sagogn haveva confirmau lur decisiun cun urbir el medem mument il dreg per las auas che neschan sin territori da Laax. Tenor Gschwend ei la varianta nova cun distanza scursanida per 500 meters pli favoreivla e d'avantag che l'oriunda. La cuolpa ein ils recuors da singuls possessurs da casas. Quels han fatg valer che la passarella projectada violeschi lur sfera privata. Giu digl implont havessen ils visitaders saviu mirar en orts e curtgins privats. Las autoritads han reagiu ed adattau

ils plans. Ils 18 da december 2019 ein la finala tuttas partidas involvidas secunvegnydas. Era ils possessurs privats han retratg lur recuors sin fundament dalla lingia nova. Ed era culla vischnaunca burgheisa da Sagogn eis ei gartegiav da suttascriver ils 10 da schaner 2020 ina cunvegna. La senda da tschemas da 1560 meters ei ina construcziun che secumpo- na d'ina roscha elements da mintgamai 12 meters lunghezia sin petgas e sochels. Denteren dat ei tschun plattafurmas tematicas en connex cun uaul, natira e didactica. La tuor d'entrada a Murschetg resta sco approbada oriundamein. Ina midada essenziala ei la tuor da sortida e d'entrada a Dimplau. Sur il vitg da Laax disturba igl object niev insumma buca pli il maletg dalla cuntrada. Auter che tiel project oriund ei la tuor zuppada denter las tschemas dils pegns.

Ils gimnasis e la formaziun politica

Il maturand Fabio Heini ei sefatschentaus d'in'interessanta damonda

DA HANS HUONDER / FMR

■ **En sia lavur da matura al gimnasi dalla claustra a Mustér ei Fabio Heini da Lumnezia sefatschentaus dalla formaziun politica als gimnasis grischuns. Denter auter ha el organisau persuerter ina retscherca.** «Cuntentientscha dallas gimnastas e dils gimnasts grischuns cun la formaziun politica.» Aschia senumna il tetel dalla lavur da matura che *Fabio Heini* ha presentau dacuort al gimnasi a Mustér. Ina part da quella ei era ina cumparegliazion dils resultats dils singuls gimnasis in cun l'auter. El ha priu sut la marella la Scuola cantunala a Cuera, il gimnasi dalla claustra a Mustér, la Scuola alpina gimnasiala a Tavau e la Scuola media evangelica ad Aschera. Il medem mument fa el propostas per optimar quella part dall'instrucziun per aschia migliurar la formaziun actuala. Las damondas ch'eiin setschentadas en quei connex ein vegnydas rispundidas cun agid da dus process. Dad ina vart ei vegniu intercoretg la lavur sin fundament dils plans d'instrucziun specifics per la scola en connex cun in'analisa che sebase sil rapport d'expert cul tetel «Formaziun politica el scalem secundar II. Ina bilanza». En quel vegn eruiu la quantitat dils temas politics relevants per aschia saver constatar empremas tendenzas ellas valurs da retscherca. Da l'autra vart eis ei stau la finamira d'eruir resultats tier las gimnastas ed ils gimnastiasts



Fabio Heini dil gimnasi a Mustér ei sefatschentaus dalla formaziun politica a quater gimnasis el cantun Grischun.

FOTO H. HUONDER

cun agid d'ina retscherca fatga sin fundament dil portal da retscherca «Findmind». «Ils resultats muossan che la cuntentientscha dils interrogai ei bassa surtut pertuccont la quantitat dalla formaziun politica.

Perencunter taxeschan las gimnastas ed ils gimnastiasts la qualitat dall'instrucziun dalla politica per relativamein aulta», constatescha Heini en sia lavur da matura. Denter il gimnasis dat ei entgi-

nas differenzas els resultats. Quellas attribuescha il maturand en emprema lingia als resultats dall'analisa dils plans d'instrucziun.

Plinavon ei ina gronda part dallas gimnastiasts e dils gimnastiasts grischuns dil meini che la purschida tier la formaziun politica seigi buca sufficienta davart la scola. Tenor els eis ei necessari da reformar surtut la quantitat dallas unitads dalla formaziun politica.

GRATULAZIUN

90avel da Margritta Candrian-Caffisch

Dumengia proxima, ils 9 da fevrer 2020 sa nossa convischina *Margritta Candrian-Caffisch* festivar siu 90avel gi da naschientscha. Cara Margritta, tiu fegl Werner cun Moni, tia feglia Helena cun Turi, ils biadis e sutbiadis, parents ed enconuschents da Trin e pli lunsch gratuleschan a ti cordialmein per quei bi ed ault anniversari. Nus tuts alzein il migiel e fagein in ferm viva sin tei. Nus giavischein a ti vinavon in bi temps cun tia famiglia e che ti fetschies vinavon schi bia caltschiel e gaudies la sera dalla veta circumdada dils tes, da vischins e convischins da Trin. Gauda dumengia la fiasta d'anniversari e stai bein.

Elsa Caprez, Trin

Essas Vus gia commember?

Procap Grischun
Hartbertstrasse 10, 7000 Cuira
Tel. 081 253 07 07, PC 70-7755-0
www.procapgrischun.ch

per persunas
cun handicap

procap grischun

Lavurs da matura

En ina seria d'entgins artechels presenta la Fundaziun Medias Rumanstchas pliras lavurs da matura dad uonn al gimnasi claustral da Mustér. Quellas ein vegnydas presentadas publicamein dacuort.